



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Tribunal Distrital Dili

06 Jullu 2015

Kay Rala Xanana Gusmão sai testemuña iha tribunál relaciona ho krime abuzu poder no la partisipasaun ne'ebé involve Calistro Gonzaga

Iha 02 Jullu 2015, Tribunál Distrital Dili hala'o rejulgamentu ba kazu krime la partisipasaun no abuzu poder ne'ebé involve eis Komandante Investigasaun Kriminál-PNTL, Calistro Gonzaga. Arguidu Calistro Gonzaga akuzadu detein no husik sidadaun Indonezia na'in 4 no Afrikanu na'in 1 ne'ebé involve iha krime droga fila ba autoridade *Badan Narkotika Nasional* (BNN), Indonesia iha 20 to'o 26 Outubru 2012.

Rejulgamentu ne'e bazeia ba desizaun Tribunál Rekursu atu hala'o julgamentu foun hodi rona depoimentu hosi testemuña eis Primeiru Ministru (PM) Xanana Gusmão, hanesan eis Ministru Defeza no Seguransa iha momentu ne'ebá.

Antes ne'e, iha 08 Agostu 2014, Tribunál Distrital Dili kondena ona arguidu ho pena prizaun tinan 9 tanba prova arguidu komete krime partisipasaun no sekuestru hasoru suspeitu na'in 5 refere.

Iha desizaun tribunál konsidera deit orden hosi Komando Jerál PNTL nu'udar sirkunstánsia atenuantes maibé la konsidera arguidu nia pedidu atu rona testemuñas sira ne'e nia depoimentu iha tribunál.

Iha JSMP nia pozisaun antes, JSMP afirma katak kualker ema ne'ebé provadu komete krime tenke hetan kondensasaun tuir gravidade krime ne'ebé nia komete. Maibé JSMP mós husu ba tribunál asegura katak arguidu iha oportunidade hodi halo defeza adekuaudu no apresenta testemuña ne'ebé relevantes tuir lei haruka. JSMP hanoin katak importante atu asegura katak julgamentu hotu tenke refleta prinsipiu "julgamentu justu" hanesan prinsipiu universal ne'ebé aplika iha estadu demokrátiku sira.

Xanana Gusmão marka prezensa iha tribunál nu'udar testemuña prinsipal hodi kumpri notifikasaun hosi tribunál relaciona ho kazu krime abuzu poder no la partisipasaun ne'ebé involve arguidu Calistro Gonzaga.

JSMP apresia kolaborasaun diak eis PM ne'ebé hatudu nia kumprimentu no hakruk ba notifikasaun tribunál. Ne'e nu'udar ezemplu ba autoridade sira seluk ne'ebé dala barak ladun kopera ho justisa no falun aan iha imunidade nia okos. Maske JSMP mós preukupadu ho maneira oinsa testemuña hato'o depoimentu iha tribunál.

Iha prosesu produsaun ba provas ne'e, eis PM depoimenta katak relasiona ho detensaun no husik sidadaun estranjeriu nain lima ne'e, la'os arguidu Calistro Gonzaga nia kulpa maibé nia nu'udar PM no nu'udar Ministru Defeza no Seguransa mak fo orden ba arguidu bazeia ba MOU (Memorandum Of Undertanding) ne'ebé Estadu Timor-Leste no Indonezia, Amerika, India, Aziátiku no seluk asina ona.

MOU ne'e defini kona-ba krime transnasiona sira nasaun sira ne'ebé asina MOU ne'e tenki intrega fila fali ema ne'e ba nia nasaun orijinal hodi tuir prosesu julgamentu. Iha kazu ida ne'e, tanba kumpri akordu refere, Timor Leste entrega sidadaun lima ne'e ba BNN (Badan Narkotika Nasional) hosi nasaun Indonezia.

Eis PM hatutan katak nia mak haruka/orienta arguidu atu lori sidadaun na'in lima ba Indonezia tanba interese nasional. Arguidu so hala'o deit orden, tanba ne'e, testemuña husu ba tribunál atu absolve total arguidu hosi akuzasaun, labele detein arguidu maske fulan ida deit no husu atu akuza fali nia nu'udar ema ne'ebé mak fo orientasaun.

“JSMP hanoin katak nu'udar testemuña, obrigasaun mak atu fo deit testemuña kona-ba faktu ne'ebé testemuña iha koñesimentu atu ajuda tribunál deskobre verdade relasiona ho kazu ruma. Testemuña ida laiha direitu atu orienta tribunál hodi absolve ka kondena arguidu ka husu tribunál atu akuza fali testemuña.” dehan Diretor Ezekutivu JSMP, Luis de Olivera Sampaio.

“Atu kondena ka absolve arguidu ruma so bazeia deit faktu/provas sira ne'ebé produs durante julgamentu no tribunál sei decide tuir deit sira nia konsensia, la'os simu orientasaun hosi testemuña,” Nia hatutan.

JSMP enkoraza ministériu públiku atu halo investigasaun klean antes akuza ema ruma nune'e bele identifika se mak nu'udar autór prinsipál no se mak nu'udar ko-autór (ema ne'ebé ajuda autór prinsipál). Tanba importante ba públiku mak hatudu justisa ida igual no kredivel tuir buat ne'ebé prevee iha artigu 16 Konstituisaun Republika kona-ba ema hotu-hotu iha direitu no dever hanesan iha lei nia oin.

JSMP mós husu ba ministériu públiku atu halo investigasaun klean hodi buka tuir kona-ba responsabilidade komando iha kazu ida-ne'e.

Julgamentu ho agenda alegasaun final sei hala'o iha 27 Jullu 2015, tuku 16:00 lorokraik.

Kazu ne'e rejistu iha tribunál ho Número Prosesu: 1227/12. PDDIL. Prosesu rezulgamentu ne'e prezide hosi juis kolektivu, Dr. Jose Maria de Araujo, Dra. Jumiati Maria Freitas no Dra. Maria

Solana (estajiária). Enkuantu Ministériu Públiku reprezenta hosi Dra. Angelina Saldanha no arguidu hetan defeza husi Dr. Sergio Quintas husi Eskritóriu Defensória Públiku.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone:3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl